

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 मंगलवार

दिनांक 24.06.2025

प्रमुख समाचार –

- 1— संविधान हत्या दिवस काली मनाय जाही—केन्द्रीय जनजाति मामला के मंत्री जुएल ओराम काली एक दिन के दउरा म रायपुर आही—आपातकाल के पचासवां बरसी म संगोष्ठी ल करही संबोधित।
- 2— केन्द्रीय गृह अउ सहकारिता मंत्री अमित शाह के पगरइति म आज वाराणसी म मध्य क्षेत्रीय परिषद के बड्डका होइस—मुख्यमंत्री विष्णुदेव साय होइस सामिल।
- 3— 'मलेरिया मुक्त छत्तीसगढ़ अभियान के बारहवां चरण काली ले होही सुरु।

अब समाचार विस्तार ले

संविधान हत्या दिवस

संविधान हत्या दिवस काली मनाय जाही। पच्चीस जून उन्नीस सौ पचहत्तर ह भारत के संविधान ल कुचले के घटना के सुरता देवाथे। ए दिन म ओ सबो झन ल श्रद्धांजलि दे जाथे, जउन मन आपातकाल के बेरा म परेसानी झेले रिहीन। ए ह भारतीय इतिहास के सबले काला समय रिहीस। ए दिन ओ जम्मों लोगन के योगदान ल घलो सुरता करे जाथे, जउन मन ह आपातकाल के कठिन परिस्थिति ल सहन करे रिहीन।

इही बीच, केन्द्रीय राज्यमंत्री तोखन साहू ह आज दुरुग के भाजपा कार्यालय म आपातकाल के पचास बछर पूरा होय के मउका म राखे गे पत्रकारवार्ता म तत्कालीन कांग्रेस सरकार उपर निसाना साधीन।

उहें, वित्तमंत्री ओ.पी. चौधरी ह जाजंगीर म पत्रकार मन ले गोठबात करत किहीन कि भाजपा ह काली पच्चीस जून के देसभर म लोकतंत्र हत्या दिवस के रूप म मनाही। ए दउरान लोकतंत्र सेनानी मन के सम्मान करे जाही। ओमन किहीन कि कांग्रेस ह आपातकाल लगाके लोकतंत्र के हत्या करे रिहीस अउ ओ बखत इंदिरा इन इंडिया—इंदिरा इज इंडिया के महौल बनाय गे रिहीस। श्री चौधरी ह किहीन कि कांग्रेस ह आपातकाल लगाके लोगन मन ल परेशान करे के काम करे रिहीन।

जुएल ओराम—छत्तीसगढ़

केन्द्रीय जनजाति मामला के मंत्री जुएल ओराम काली छत्तीसगढ़ के एक दिन के दउरा म आही। श्री ओराम रायपुर म पत्रकारवार्ता के बाद आपातकाल के पचासवां बरसी म एक संगोष्ठी ल संबोधित करही। ए जानकारी भारतीय जनता पार्टी के प्रदेश महामंत्री अउ कार्यक्रम संयोजक रामजी भारती ह दीन। ओमन बतईन कि श्री ओराम आपातकाल के बरसी म होवइया संगोष्ठी म मुख्य वक्ता के रूप म सामिल होही। संगोष्ठी म कार्यक्रम सह संयोजक सच्चिदानंद उपासने, इंदिरा गांधी कृषि विश्वविद्यालय के कुलपति डॉक्टर गिरीश चंदेल, महात्मा गांधी विश्वविद्यालय के कुलपति डॉक्टर रवि सक्सेना अउ राजनांदगांव के भाजपा सांसद संतोष पांडेय ह अपन विचार राखही। कार्यक्रम म लोकतंत्र सेनानी के सम्मान करे जाही। एखर बाद श्री ओराम पौधारोपण कार्यक्रम म घलो हिस्सा लीहीं।

मध्य क्षेत्रीय परिषद—बैठक

केन्द्रीय गृह अउ सहकारिता मंत्री अमित शाह के पगरइति म आज वाराणसी म मध्य क्षेत्रीय परिषद के पच्चीसवां बइठका होइस। ए बइठका म छत्तीसगढ़ के मुख्यमंत्री विष्णुदेव साय समेत उत्तरप्रदेश के मुख्यमंत्री योगी आदित्यनाथ, मध्यप्रदेश के मुख्यमंत्री मोहन यादव अउ उत्तराखंड के मुख्यमंत्री पुष्कर सिंह धामी घलो मौजूद रिहीन। बइठका म राज्य मनके बीच समन्वय, सुरक्षा, स्वास्थ्य, पर्यटन, परिवहन, आपदा प्रबंधन अउ अवसंरचना विकास जइसन बिसय उपर गोठबात होइस।

केन्द्रीय गृहमंत्री—जवान संवाद

केन्द्रीय गृहमंत्री अमित शाह ह काली नवा रायपुर म सुरक्षा बल के जवान मन संग संवाद करीन। ए दउरान श्री शाह ह कहिन कि सुरक्षा बल मन ह जउन सौर्य, धैर्य अउ समर्पण के संग माओवादी मनके बनाए अड़्डा ल तहस—नहस करे हे, ओह विश्व के जम्मा सुरक्षा बल मन ल अंचिभित कर देहे। सुरक्षा बल के इही भरोसा ले केन्द्र सरकार ह देस म इक्तीस मार्च दू हजार छब्बीस तक नक्सलवाद के खात्मा ल लेके आश्वस्त हे। श्री शाह ह किहीन कि प्रधानमंत्री नरेन्द्र मोदी के अगुवाई म जब देस ह नक्सलवाद ले मुक्त होही, त वो क्षण आजादी के बाद के सबले जादा बिसेस क्षण होही। ओमन किहीन कि नक्सलवाद के खात्मा के इतिहास लिखे के संगेसंग सुरक्षा बल मनके जवान के त्याग, बलिदान अउ मेहनत ह स्वर्णिम अक्षर म अंकित होही।

ए मउका म केन्द्रीय गृहमंत्री ह नक्सली मन डहार ले आदिवासी मनके संहार अउ बस्तर ल बचाय के कोसिस म लिखे गे पुस्तक “लियोर ओयना” के लोकार्पण घलो करीन।

ए मउका म मुख्यमंत्री विष्णुदेव साय, उपमुख्यमंत्री विजय शर्मा, केन्द्रीय गृह सचिव, आसूचना ब्यूरो के निदेशक, बीएसएफ के महानिदेशक समेत आने—आने बड़का अधिकारी मन मौजूद रिहीन।

मलेरिया मुक्त छत्तीसगढ़ अभियान

“मलेरिया मुक्त छत्तीसगढ़ अभियान के बारहवां चरण काली ले सुरू होही। ए अभियान के तहत मलेरिया प्रभावित अउ संवेदनशील क्षेत्र म बड़का पैमाना म जांच, उपचार अउ जनजागरुकता गतिविधि आयोजित करे जाही। मलेरिया मुक्त छत्तीसगढ़ अभियान ले बस्तर संभाग म मलेरिया के मामला म बहत्तर प्रतिशत तक के कमी दर्ज करे गेहे। राज्य सरकार अउ स्वास्थ्य विभाग ह बछर दू हजार सत्ताईस तक मलेरिया के खात्मा के लक्ष्य राखे हे। ए अभियान के फोकस विशेष रूप ले बस्तर संभाग के सबो सात जिला — बस्तर, दंतेवाड़ा, बीजापुर, सुकमा, नारायणपुर, कांगेर अउ कोंडागांव के संगेसंग गरियाबंद, खैरागढ़—छुईखदान—गंडई अउ कवर्धा जिला म चिन्हांकित क्षेत्र मन म रइही।

धरती आबा ग्राम उत्कर्ष अभियान

धरती आबा जनजातीय ग्राम उत्कर्ष अभियान के तहत ए दिन प्रदेशभर म आने—आने कार्यक्रम आयोजित करे जावत हे। इही कड़ी म कोंडागांव जिला के बनियागांव अउ माकड़ी विकासखंड म सिविर लगाय गीस। ए सिविर म बस्तर विकास प्राधिकरण के उपाध्यक्ष लता उसेंडी ह किहीन कि धरती आबा जनजातीय ग्राम उत्कर्ष अभियान के उद्देश्य जनजातीय क्षेत्र मन म अधोसंरचना विकास के संगेसंग हितग्राहीमूलक योजना के लाभ पहुँचाना हे। कार्यक्रम म खाद्य विभाग डहार ले चौदह हितग्राही मन ल रासन कार्ड, नौ किसान मन ल किसान क्रेडिट कार्ड, छह हितग्राही मन ल सब्जी—बीज के वितरण अउ स्वास्थ्य विभाग डहार ले आठ हितग्राही मन ल आयुष्मान कार्ड दे गीस।

जशपुर—कृषि क्रांति

जशपुर म “कृषि क्रांति” अभियान के तहत अक्टूबर्स अउ उनतीस जून के दू दिन के सम्मेलन के आयोजन करे जाही। ए सम्मेलन के उद्देश्य जिला के किसान मन ल राष्ट्रीय स्तर म बाजार ले जोड़के उंखर उत्पाद ल सुध्दर दाम देवाना हे। जिला म कृषि, उद्यानिकी अउ रेशम उत्पादन ल प्रोत्साहन दे बर जिला प्रशासन डहार ले पहली बखत एग्री—हॉटी क्रेता—विक्रेता सम्मेलन के आयोजन करे जाही। सम्मेलन के पहिली दिन क्रेता—विक्रेता परिचय सत्र, फसल संग्रहण, संरक्षण अउ प्रसंस्करण संबंधी तकनीकी जानकारी के संगेसंग कृषि, उद्यानिकी, रेशम अउ वनोपज के निर्यात ल बढ़ावा दे बर गुणवत्ता मानक, नियम अउ विपणन व्यवस्था के जानकारी दे जाही। एखरे संग आने—आने फसल के प्रदर्शनी घलो लगाय जाही।

उहें, दूसरइया दिन उनतीस जून के देस के आने-आने राज्य ले आय उद्यमी मन ल जिला के खेत अउ उत्पाद मनके घुमाय जाही, जेखर ले ओमन किसान मनके उत्पाद ल जान सकही। ए ह किसान अउ कंपनी मनके बीच किसान उत्पादक संगठन-एफ.पी.ओ. के माध्यम ले सीधा संवाद अउ विपणन के दिसा म बढ़िया कदम होही। एखर ले बिचौलिया मनके भूमिका खतम होही अउ किसान मन ल उंखर उपज के उचित मूल्य मिलही।

सचिन पायलट-प्रेसवार्ता

अखिल भारतीय कांग्रेस कमेटी के महासचिव अउ छत्तीसगढ़ प्रभारी सचिन पायलट ह आज रायपुर स्थित राजीव भवन म पत्रकार मन ले गोठबात करीन। ओमन बतईन कि अवइया सात जुलाई के कांग्रेस पार्टी राजधानी रायपुर के साईंस कॉलेज मैदान म “किसान, जवान, संविधान” सभा के आयोजन करही। ए सभा ल कांग्रेस के राष्ट्रीय अध्यक्ष मल्लिकार्जुन खड़गे अउ कांग्रेस के संगठन महासचिव के.सी. वेणुगोपाल संबोधित करही। ए दउरान ओमन प्रदेश के भाजपा सरकार उपर कई ठिन आरोप लगईन।

ऑपरेशन साइबर शील्ड-कार्रवाई

ऑपरेशन साइबर शील्ड के तहत फर्जी सिम बेचइया मन उपर रायपुर पुलिस ह कार्रवाई करे हे। ए मामला म पुलिस ह फर्जी सिम कार्ड विक्रेता, एजेंट, डिस्ट्रीब्यूटर समेत ग्यारह आरोपी मन ल राजस्थान, मध्यप्रदेश, रायपुर, दुरुग अउ धमतरी ले गिरफ्तार करे हे। पुलिस के मुताबिक आरोपी मन ह फर्जी सिम यूनाइटेड अरब अमीरात, श्रीलंका, नेपाल अउ म्यांमार जइसन देश के म्यूल अकाउंट के ब्रोकर, डिस्ट्रीब्यूटर अउ संचालक मन ल बेचे रिहीन। पुलिस कार्रवाई म अब तक सात हजार ले जादा सिम कार्ड अउ पांच सौ नब्बे मोबाइल के पहिचान होय हे।
